

tit-tit bē òah-tāng, koh io-chek-kut téng se<sup>n</sup> chit bô kòai-mih nā-tiā<sup>n</sup>. Hō<sup>n</sup> lāng không thèh--chhut--lâi ê i m̄ sī í-keng sí-bông, á-sī bô ki-hōe òah ê gín-á. Khòa<sup>n</sup> i phah-pià<sup>n</sup> teh chhóan-khùi, i ê khàu-sia<sup>n</sup> ū sī<sup>n</sup>-miā tui-kiū seng-chhūn ê khùi-lát. Só-ū tī sán-pāng lâi ê lāng lóng kám-siū--tiòh--ah. I ê mama iā it-tēng thia<sup>n</sup> tiòh i ê kiá<sup>n</sup> bī-bī ê khàu-sia<sup>n</sup>. M̄-chai i hit sī án-chóa<sup>n</sup> siū<sup>n</sup>? Chhe<sup>n</sup>-kông put-an ê hoeh-liū chin kín lâu kàu góa sin-khu ták só-chāi. Tāi-ke lóng chēng-chēng teh tán ē-chit-pō, m̄ ká<sup>n</sup> tōa sia<sup>n</sup> chhóan-khùi. Chiàu Chú-tī-i-su ê keng-giām, chit ê e<sup>n</sup>-á chiū sng bô pó-un mā ū khó-lêng òah kàu thi<sup>n</sup> kng. Beh kiū á m̄? Chòe-āu koat-tēng seng chhiá<sup>n</sup> sió-jī-kho i-su (pediatrician) lâi pēng-kó liáu chiah kóng.

Tán-thāi ê sī-khek, e<sup>n</sup>-á iū-gōan tī pó-un-tāi téng sòe-sòe chhut sia<sup>n</sup>. Iáu tó tī sán-tāi téng ê mama om-bīn lâi tui, siū<sup>n</sup>--lâi sī khiā tī lí-sèng kap không beh liáh-kông ê pi<sup>n</sup>-kī<sup>n</sup>. Chhú-sí chhú-khek, i chún sī ñg-bāng òe tit kóa<sup>n</sup>-kín lí-khui chit ê pāng-keng.

Chhiá<sup>n</sup> sió-jī-kho i-su lâi, pún-lâi chiū tui tong-chhō thèh-gín-á ê hēng-ūi kóng bē tit kòe. Chiū sī bô ài, hòng-khì--ah chiah beh không thèh, chit sī kiám ū lí-iū koh chhiá<sup>n</sup>

sió-jī-kho i-su lâi? Kiū-lāng sī i-su ê thian-chit, chit-tiáp sòa teh tiū<sup>n</sup>-tū. Kiū-lāng m̄ sī tong-jiân, m̄ sī múi chit ê i-seng só kian-chhī ê sìn-liām? Nā chún beh kiū, tui hiān-chhú-sī ê i-liâu lâi kóng pēng bô tōa khùn-lân. Chiū sī òe tit kiū, chiah jú hō lāng chhiong-kek.

Koh chit-pái, pē-bú kap i-seng bīn-tui hòng-khì gín-á ê sóan-ték. Pē-bú iáu sī pang i kū-chòat in bô ài i kòe ê jīn-seng. In-ūi án-ni, sió-jī-kho i-su tī chò liáu chhō sī<sup>n</sup> e<sup>n</sup>-á ê ki-pún chhú-lí chiū lí-khui. Pē-bú iā lí-khui. Chòe-āu hū-sán-kho i-seng iā lí-khui--lōh. Kan-ta<sup>n</sup> lâu bebi (baby) chit ê lāng tiām tī sán-pāng--nih.

Put-an ê chit mê kòe--khì, i iáu teh pià<sup>n</sup>-miā chhóan-khùi. Góa bô siū<sup>n</sup> beh chai-íá<sup>n</sup> i ê sī<sup>n</sup>-miā í-chhī kàu hô-sī, mā bô ài koh khòa<sup>n</sup> tiòh chá chiū hō lāng soan-phò<sup>n</sup> sí-bông ê chit ê siok tī thian-kok ê gín-á.

Hiān-sit ê lèk-liōng kap bô-chēng chiàn-sèng it-chhè. Chit ê 28 chiu tōa ê “lāng” tong-jiân bô lēng-lèk piáu-sī ka-kī seng-chhūn ê ì-gōan. Nā án-ni, tàu-té kiám ū lāng ū kōan-lí koat-tēng i ê sē<sup>n</sup>-miā? Khòe-sū kàu chia. Keng-kòe lōe-sim ê tōa tē tāng, nā koh chit pái gū--tiòh, góa kiám òe ū tap-àn?



Chhiò-khoe

Góa Kiò Sím-mih Miā

Ông Siok-chhiu Òk

Ū chit jit, chit ê seng-bút kàu-siū, beh kā hák-seng khó-chhi. I kōa<sup>n</sup> chit kha chiáu-láng-á jip lâi kàu-sek. Chiáu-láng-á lâi-bīn ū chit chiah chiáu-á, gōa-bīn iōng chit tē ò-pò khàm--leh.

Chit ê kàu-siū hian-khui chit-sut-á ò-pò, hō hák-seng khòa<sup>n</sup> chiáu-á ê kha. Kàu-siū m̄ng hák-seng kóng, "Chit chiah chiáu-á sī sím-mih khoán chiáu-á, kā i ê miā siá--chhut--lâi".

Ū chit ê hák-seng chin siū-khì. I siū<sup>n</sup> kóng kan-ta<sup>n</sup> khòa<sup>n</sup> chiáu-á-kha, beh ná ē chai-íá<sup>n</sup> sī sím-mih khoán chiáu-á. Só-í i chiū bô ài chham-ka khó-chhi, tui kàu-sek kiā<sup>n</sup>--chhut--khì. Kàu-siū khòa<sup>n</sup>--tiòh, chiū kā kiò lâi m̄ng kóng "Lí sī án-chóa<sup>n</sup> m̄-ài khó-chhi. Lí kiò sím-mih miā? "Chit ê hák-seng lóng bô kóng-òe, kan-ta<sup>n</sup> lèk i ê khòe-kha--khí--lâi hō kàu-siū khòa<sup>n</sup> i ê kha, kóng, " Lí khòa<sup>n</sup> góa ê kha, góa kiò sím-mih miā?".